



Fidoyilik —
Vatanga xizmat demak!

2024-yil 28-sentabr, shanba,
112 (23.989)-son

**KUN
HIKMATI**

Hayotni
anglashdan
ko'ra uni
o'zgartirish
osonroq

1913-yil aprel oyidan chiqib boshlagan



www.zarnews.uz <https://www.facebook.com/zarnews.uz> [@zarnews_uz](https://twitter.com/zarnews_uz) https://twitter.com/zarnews_uz

Xitoy delegatsiyasi Samarqandda

↓ Samarqand mehmonlari



Huquqni muhofaza qilish faoliyati va xavfsizlik sohasidagi O'zbekiston-Xitoy hamkorlik mexanizmining birinchi yig'ilishida ishtirok etish uchun mamlakatimizga tashrif buyurgan Xitoy Kommunistik partiyasi Markaziy qo'mitasi Siyosiy byurosi a'zosi, siyosiy-yuridik komissiyasi kotibi Chen Vensin boshchiligidagi delegatsiya kecha Samarqandda bo'ldi.

Mehmonlar dastlab Mirzo Ulug'bek rasadxonasida bo'lib, buyuk olimning astronomiya fani rivojiga qo'shgan hissasi, hukmdor sifatidagi bunyodkorlik ishlari haqida ma'lumotlarga ega bo'ldi.

"Afrosiyob" muzeyi, Amir Temur maqbarasi va Registon majmuasi bilan tanishuv chog'ida Xitoy delegatsiyasiga xalqimizning davlatchilik tarixi, ajdodlarimiz tomonidan bunyod etilgan tarixiy obidalar va ularni asrab-avaylash borasida amalga oshirilayotgan ishlar haqida gapirib berildi.

Samarqandga safar davomida Xitoy Kommunistik partiyasi Markaziy qo'mitasi Siyosiy byurosi a'zosi, siyosiy-yuridik komissiyasi kotibi Chen Vensin viloyat hokimi E.Turdimov bilan ham uchrashdi. Uchrashuvda keyingi yillarda barcha sohalarida rivojlanib borayotgan O'zbekiston - Xitoy munosabatlarini yanada mustahkamlash, ikki davlat hududlari o'rtasidagi savdo-iqtisodiy, madaniy-gumanitar aloqalar ko'lamini kengaytirish zarurligi ta'kidlandi.

Quyoshli kunlari ko'p bo'lgan yurtimizda qayta tiklanadigan energiya manbalaridan foydalanish juda samarali. Tejamkor qurilmalar uyingizni elektr bilan ta'minlashdan tashqari cho'ntagingizga daromad ham keltiradi. Past Darg'om tumani Nayman mahallasida yashovchi Alisher Hamroyev o'z xonadoniga quyosh batareyalari o'rnatib daromad olayotganlardan biri. U ikki yildan buyon 15 KVlik quyosh panellari orqali muzlatkich, 2 ta konditsioner, televizor, o'nga yaqin tejamkor chiroqlardan foydalanib keladi.

Quyoshdan daromad olayotgan usta



- Uydan tashqari ustaxonamda ham turli qurilmalar ishlataman, - deydi avtomashina ustasi A.Hamroyev. - Shu paytgacha elektr energiyasi uchun ko'p mablag' sarflardim. Uyimiz tomiga quyosh panellari o'rnatganimda ayrim tanishlarim «uning foydasi yo'q, muzlatkich va konditsionerni yoqishga kuchi yetmas ekan, tez ishdan chiqarkan», deyishgandi. Shunday bo'lsa-da, 28 dona panelni batareyasi bilan keltirib o'rnatdik. Mana, hozircha beto'xtov ishlab turibdi. Quyosh chiqsa bo'ldi, hamma uskunalar bekami-ko'st ishlaydi. Ehtiyojdan ortgan elektr quvvatini sotib, daromad ham qilyapman. Usta ortiqcha elektr energiyasini sotish mum-

kinligini eshitgach, «Soliq» platformasidan onlayn tarzda ro'yxatdan o'tdi. - Bir kuni qo'l telefonimga «Sizning tejab, davlatga o'tkazgan elektr energiyangiz uchun 600 ming so'm mablag' o'tkazib berilyapti», degan SMS keldi, - deydi Alisher usta. - Ishonmadim, tekshirib ko'rsam, rostdan ham kelib tushibdi. Shundan buyon har oyda turli miqdorda pul kelib tushadi. Iyul oyida 900 ming so'm, avgustda esa 1 million so'mlik elektr energiyasi. Endi tanishlarim ham o'z uylariga quyosh panellari o'rnatib boshladi. Yaqinda Alisher Hamroyev uyiga quyosh nurlari bilan isitiladigan geliokollektor ham o'rnatdi va issiq suv muammosini hal etdi. **Dilmurod TO'XTAYEV.**

Abu Dabi Taraqqiyot jamg'armasi ishtirokida mehmonxona quriladi

Viloyat hokimi Erkinjon Turdimov Abu Dabi Taraqqiyot jamg'armasi bosh direktori Muhammad Saif Al Suvaydi boshchiligidagi delegatsiya bilan uchrashdi. Hokimlik axborot xizmatining ma'lum qilishicha, uchrashuvda tomonlar so'nggi yillarda O'zbekiston - Birlashgan Arab Amirliklari hamkorligi rivojlanib borayotganligini ta'kidladi. Ayni paytda Samarqand shahrida Abu Dabi Taraqqiyot jamg'armasi ishtirokida suv ta'minoti tizimlari va yo'l tarmoqlarini modernizatsiya qilish ishlari olib borilmoqda.

E.Turdimov ushbu loyihalar Samarqand shahri infratuzilmasini yanada takomillashtirish va aholi farovonligini oshirishga xizmat qilishini qayd etdi.

Abu Dabi Taraqqiyot jamg'armasi bosh direktori ham Samarqanddagi loyihalar muvaffaqiyatli amalga oshirilayotganini ta'kidlab, jamg'arma O'zbekiston va BAA o'rtasidagi do'stona va yaqin munosabatlarni yanada mustahkamlash maqsadida hamkorlikni kengaytirish niyatida ekanini bildirdi. Jumladan, Abu Dabi Taraqqiyot jamg'armasi va Samarqand viloyati hokimligi o'rtasida uzoq muddatli va o'zaro manfaatli hamkorlik davom etishini ta'kidladi.

Uchrashuvda jamg'arma ishtirokida Samarqandda mehmonxona va savdo markazi qurilishi masalalari ham muhokama etildi.



O'zLiDeP taklifi

o'g'il-qizlarimizni uyli-joyli qilishdek ezgu niyat ro'yobiga xizmat qiladi



Samarqand davlat universitetida o'tkazilgan partiya saylovoldi targ'ibot tadbirida partiyaning kelgusi besh yillikdagi eng muhim vazifalariga e'tibor qaratildi.

Tadbirida ishtirok etgan O'zLiDeP siyosiy kengashi ijroiya qo'mitasi raisi Aktam Xaitov partiya bu yilgi saylovlarga "Va'da emas - natija, ertaga emas - bugun" ezgu shiori ostida "5 maqsad-500 vazifani" o'z ichiga qamrab olgan saylovoldi dasturi bilan qizg'in tayyorgarlik ko'rayotganligini ta'kidladi.

Partiya keyingi besh yillikda tadbirkorlar sonini 3 million nafardan oshirishni, kambag'allik ko'lamini ikki karra qisqartirib, aholini tadbirkorlikka jalb qilishning mahallabay dasturlarini ishlab chiqishni o'zining ustuvor vazifasi, deb biladi.

Uchrashuvda yoshlarni xorijiy tillarga o'qitish, ijtimoiy qo'llab-quvvatlash hamda IT sohasi va sportga keng jalb etish borasida puxta ishlangan rejalarni amalga oshirish, xususan, ishsiz yoshlarni zamonaviy kasblarga o'qitish tizimini tubdan qayta ko'rib chiqish singari dolzarb masalalar tilga olindi.

Qayd qilinganidek, partiya yoshlar uchun maxsus uy-joylar qurish va har yili mingta yosh oilaga imtiyozli ipoteka kreditlari berishni taklif qilmoqda. Bu tashabbus mamlakatimizda yashayotgan har bir o'g'il-qizning vatanli bo'lishdek ezgu niyati ro'yobiga xizmat qiladi.

Yig'ilishda partiya saylovoldi dasturidagi boshqa muhim vazifalarga ham to'xtalib o'tildi, ishtirokchilar bo'lajak saylovlarda O'zLiDeP uchun ovoz berishga chaqirildi.

O'zLiDeP viloyat kengashi axborot xizmati.

Har bir saylovchining ovozi

partiyaga va uning nomzodlariga bildirilgan yuksak ishonch ifodasi



"Milliy tiklanish" demokratik partiyasi va partiyadan parlament hamda mahalliy Kengashlarga ko'rsatilgan nomzodlar saylovoldi tashviqotini har jihatdan samarali tashkil etishga astoydil harakat qilmoqda.

Ishtixon pedagogika kolleji faollar zalida partiyaning viloyat kengashi tomonidan o'tkazilgan tadbirida ham "Milliy tiklanish" demokratik partiyasi saylovoldi dasturining asosiy yo'nalishlari, ularning mohiyati va ahamiyati xususida batafsil ma'lumot berildi.

Shundan so'ng partiyadan mahalliy Kengashlar deputatligiga ko'rsatilgan nomzodlar o'z saylovoldi dasturi bilan saylovchilarni yaqindan tanishtirib, kelgusidagi maqsad va rejalari bilan o'rtoqlashdi.

Tadbirida bu yil mamlakatimizda parlament deputatligiga saylovlar ilk bor aralash saylov tizimi asosida o'tkazilayotganiga e'tibor qaratilib, har bir saylovchining ovozi partiyaga va uning nomzodlariga bildirilgan yuksak ishonch ifodasi ekanligi ta'kidlandi.

Xalq deputatlari Ishtixon tumani kengashi deputatligiga nomzod Vasila Soliyevaning Xumo mahallasi saylovchilari bilan uchrashuvda asli kasbi o'qituvchi bo'lgan deputatlikka nomzod o'z dasturida tarybiya va ta'lim, oilalarni mustahkamlash, yoshlar bandligini ta'minlash, hududni ijtimoiy rivojlantirish masalasiga alohida e'tibor qaratganini ta'kidladi. dastur mahallalarda kuzatilayotgan ayrim muammolarni bartaraf etishga xizmat qilishini bildirdi.

Nomzod saylovoldi tashviqotini nafaqat mahallalarda, shu jumladan, uy-uy yurib tashkil etmoqda.

Partiya viloyat kengashi axborot xizmati.

Harbiylar

Ekologik partiyani qo'llab-quvvatlashga chaqirildi



Partiyadan ko'rsatilgan nomzodlarning Samarqand shahridagi O'zbekiston Respublikasi Qurolli Kuchlari tizimiga qarashli serjantlar tayyorlash markazida saylovchilar bilan uchrashuvi bo'lib o'tdi.

Uchrashuvda Oliy Majlis Qonunchilik palatasi deputati Anvar Shamsiyev va boshqa nomzodlar saylovchilarni o'zi va partiyaning saylovoldi dasturi bilan tanishtirib, ilgari surilayotgan g'oya va tashabbuslar xalqimizni o'ylantirib kelayotgan dolzarb muammolarni hal etishda muhim dasturlamal bo'lishini ta'kidladilar.

Qayd etilganidek, tamaki chekish muammosi yildan-yilga global tus olmoqda. Jahon Sog'liqni saqlash tashkiloti ma'lumotlariga ko'ra, hozirda dunyodagi 7,5 milliarddan ortiq aholisi orasida 1 milliardga yaqin chekuvchilar bor. Tahlillarga ko'ra, har yili tamaki iste'molchilari 5,7 milliard sigaret chekadi va taxminan 1 million tonna sigaret qoldig'ini tashlaydi. Shundan kelib chiqqan holda bunga qarshi turli mamlakatlarda kurash olib borilmoqda. Tamaki mahsulotlarini cheklash, yuqori stavkali soliqlar qo'llash, qo'shimcha soliqlar joriy etish choralarini amaliyotga tatbiq etilmoqda. Bundan ko'zlangan maqsad chekmaydiganlarni va atrof-muhitni tamaki chekish tufayli atrofga yetkazilayotgan zararlar ta'siridan himoya qilish bilan izohlanadi.

Partiya taklif qilayotgan O'zbekistonda tamaki soliqlarini joriy etish nafaqat davlatning sog'liqni saqlash va iqtisodiyot sohasidagi islohotlarini qo'llab-quvvatlaydi, balki mamlakatimizning atrof-muhitni muhofaza qilish va barqaror rivojlanishga qaratilgan «yashil» siyosatini ham mustahkamlaydi.

Targ'ibot tadbirida partiya takliflarining qo'llab-quvvatlanishi orqali yashillikni, toza havo va tabiiy musaffoligini saqlab qolishga hissa qo'shishi shu kabi misollar bilan asoslab berildi.

Shuningdek, partiyadan ko'rsatilgan nomzodlar saylovchilar bilan muloqotga kirishib, ularning savollariga atroflicha javob berib, taklif va mulohazalarini tingladi.

Partiya veb-sayti xabarlari asosida tayyorlandi.

Davlat xizmatlari ko'rsatish sohasi fuqaro va davlat o'rtasidagi munosabatning asosiy bo'g'ini hisoblanadi. Keyingi yillarda yurtimizda ham mazkur tizimni yanada takomillashtirish, xususan, xizmat ko'rsatish vaqtini qisqartirish va sifatini oshirish borasida salmoqli ishlar qilindi. Ammo u qancha isloh qilinmasin, jarayonda qonun buzilishi bor ekan, bundan birinchi navbatda fuqaro jabr ko'radi.

Ma'lumotga ko'ra, joriy yilning birinchi yarmida viloyat adliya boshqarmasi tomonidan fuqarolarning murojaatlarini o'rganish, tekshirish va monitoringlar o'tkazish davomida davlat xizmatlari ko'rsatish sohasida 32509 ta qonun buzilishi aniqlangan. Shundan, 28020 holatda davlat xizmatlari ko'rsatish muddati buzilgan, 3331 holatda murojaatlar asossiz rad etilgan, 84 holatda murojaatchidan ortiqcha hujjat talab qilingan bo'lsa, 63 holatda to'g'ridan-to'g'ri davlat xizmatlari ko'rsatilgan.

Buni tashkilotlar kesimida ko'rib chiqadigan bo'lsak, "Samarqand suv ta'minoti" mas'uliyati cheklangan jamiyati va uning hududiy filiallari tomonidan shu davrda 15039 ta so'rovnomanini ko'rib chiqish tartibi buzilgan. Undan keyingi o'rinlarda turgan Davlat kadastrlari palatasining viloyat boshqarmasi va uning hududiy filiallarida 4531 ta, "Hududiy elektr tarmoqlari" aksiyadorlik jamiyati Samarqand hududiy filialida 3772 ta, sog'liqni saqlash muassasalarida 2208 ta, qurilish va arxitektura idoralari 1719 ta, "Hududgaz Samarqand" gaz ta'minoti filialida 1056 ta qonunbuzilishi aniqlangan. Xususan, ichki ishlar boshqarmasi yo'l harakati xavfsizligi boshqarmasi ham 644 holatda davlat xizmatini ko'rsatish tartibini buzgan.

Misol uchun, fuqaro T.N.ning 2024-yil 12-iyundagi Yagona interaktiv davlat xizmatlari portali orqali yuborgan "Maishiy iste'molchilarni 20 kVt gacha bo'lgan elektr tarmoqlariga ulash" to'g'risidagi so'rovnomasi ijro uchun Paxtach tuman elektr tarmoqlari korxonasiga yuborilgan. Ma'muriy reglamentda quvvati 20 kVt gacha bo'lgan iste'molchilarni elektr tarmoqlariga ulashda texnik shartlarni ishlab chiqish talab etilmasligi va ulash sxema asosida amalga oshirilishi belgilangan. Biroq mas'ullar mazkur so'rovnomanini ko'rib chiqishda reglament talablariga rioya etmagan hamda quvvati 10 kVt gacha bo'lgan elektr tarmoqlariga ulash uchun "texnik shart" ishlab chiqib, tizimga yuklagan.

Xuddi shunday, xususiy korxonalar rahbari I.O.ning

Qonun buzilishiga sabab nima?

Yoxud davlat xizmatlaridagi qulayliklarning noqulayligi

2024-yil 7-avgustdagi "Gaz ta'minoti loyihasini hududiy gaz ta'minoti korxonasi bilan kelishish" to'g'risidagi so'rovnomasi "Hududgaz Samarqand" gaz ta'minoti filiali tomonidan 7 kunga kechiktirib ko'rib chiqilgan va "aniqlanmadi" degan vaj bilan asossiz rad etilgan. Bu kabi qonunbuzarlik gaz ta'minoti korxonasi tomonidan ko'p bora takrorlangan. Bu esa aholining tizimga, umuman, davlat xizmatlari sohasiga ishonchini yo'qotmoqda.

- Yangi uy-joy qurib, gaz tarmog'iga ulanish uchun ikki marta ariza yozdim, - deydi shaxsini oshkor qilmasligimni so'ragan fuqarolardan biri. - Har gal rad javobini oldim. Davlat xizmatlari markaziga kelsam, bizda muammo yo'q deyishadi. Yana shu, eski tartib, tumandagi gaz ta'minoti korxonasiga borishga majbur bo'ldim. Bu xalqni ovora qilish emasmis?

Biz davlat xizmatini ko'rsatish jarayonidagi qonun buzilishlarining sababini bilish maqsadida yuqorida nomi tilga olingan ayrim idoralar mas'ullari bilan bog'landik. Ba'zilar mazkur raqamlar qayerdan kelganini bilmaymiz deyishsa, boshqalari aslida qonunlarni buzmagani, so'rovnomalarga asosli "rad" javobini berishganini ta'kidlashdi.

- Adliya boshqarmasida o'tkazilgan yig'ilishda mavzu doirasida atroflicha gaplashib, fikr va takliflarimizni berganmiz, - deydi "Hududiy elektr tarmoqlari" aksiyadorlik jamiyati Samarqand hududiy filiali yetakchi muhandisi Shohruh Nomozov. - Jumladan, elektr

ta'minoti korxonasi tomonidan ko'rsatiladigan xizmatlar reglamenti qisqa belgilangan. Bugungi shtatlar birligi bilan kelib tushayotgan so'rovnomalarning barchasini o'z vaqtida ko'rib chiqish imkonsiz. Bundan tashqari, reja bo'yicha va davlat dasturlari bo'yicha topshiriqlar, tarmoqlarda avariya holatlari bo'ladi. Xodimlarimiz shusiz ham yuklama bilan ishlab, yana so'rovnomalarni vaqtida ko'rib chiqmaganligi uchun intizomiy jazoga tortilmoqda. Buni qayta o'rganish kerak.

Darhaqiqat, viloyat adliya boshqarmasi tomonidan joriy yilning birinchi yarim yilligida yuqoridagi holatlar bo'yicha vakolatlari idoralarning rahbarlari nomida 41 ta taqdimnoma va 649 ta ogohnoma kiritilgan. Shuningdek, 288 nafar aybdor shaxsga nisbatan ma'muriy huquqbuzarlik to'g'risida bayonnomasi rasmiylashtirilib, 17 nafarining intizomiy javobgarlikka tortilishi ta'minlangan. Shundan 2 nafar xodim bilan tuzilgan mehnat shartnomasi bekor qilingan.

Demak, qaysidir ma'noda asossiz "rad" etilgan so'rovnomalarni uni o'z vaqtida ko'rib chiqish qiyinligini bilgan mas'ullarning javobgarlikdan qochishga urinishi deyish mumkin. Yoki o'rtada yana qandaydir manfaat bor. Bu harakatga sabab kerak-ku. Xullas, bir muammo ikkinchisini, u esa uchinchisini keltirib chiqarmoqda. Orada murojaatchi ovora.

Mas'ullar masalaning oxiriga yetishi kerak.

Asqar BAROTOV,
"Zarafshon" muxbiri.

Kamtarin muallima edi

Muallimlik mashaqqatli kasb. Chunki ustoz turli xil xarakterdagi bola bilan tillashishi, ularga bilim o'rgata olishi kerak. Yaxshi tomoni, muallimning nomini eslab turadigan, uning haqiga duo qiladigan ko'plab shogirdlari bo'ladi. Mehribon ustoz, oqila ayol Munazzara Narziyeva ham maktabda ishlab, umrini bolalar ta'lim-tarbiyasiga bag'ishladi.



M. Narziyeva 1928-yilda Samarqand tumanining Yuqori Talibbarzu qishlog'ida dunyoga keldi. Uning maktab yillari ikkinchi jahon urushi davriga to'g'ri keldi. Maktab o'quvchilari ham dalaga chiqar, kattalar bilan yonma-yon mehnat qilardi. Munazzara ham maktabdan kelgach, paxta dalasiga chiqib, hayotning og'ir damlarini yosh vujudida bilan his etardi.

Maktabni bitirgach, uni turmushga berishdi. Turmush o'rtog'i Ubaydulla Narziyev ziyoli inson edi. Shuning uchun Munazzarani o'qishini davom ettirib, oliy ma'lumot olishga undadi. U Samarqand davlat pedagogika institutida boshlang'ich sinf o'qituvchisi mutaxassisligi bo'yicha o'qidi.

Institutni bitirgach, dastlab Samarqand shahridagi 9-maktabda boshlang'ich sinflar dars berdi. So'ngra Samarqand tumanidagi sobiq 42-maktabda ishladi. O'quvchilarga ta'lim-tarbiya bilan birga mehnat berdi, shogirdlari qalbidan joy oldi. Bugun muallimning shogirdlari Vatanimizning turli jabhalarida mehnat qilmoqda.

M. Narziyeva tirishqoqligi, fidoyiligi, intizomligi bilan jamoada hurmat-e'tiborga sazovor bo'ldi. Hamkasblari bilan ahillikda faoliyat yuritdi.

Oilasida 4 o'g'il va 3 qizni tarbiyaladi. Ularni oliy ma'lumotli qildi. 50 dan ortiq nabira va evara, 5 nafar chevaraning mehribon buvisi bo'lib, keksalik onlarini o'tkazdi.

Muallimlik kasbi ortidan umrini savobli amallarga bag'ishlagan M. Narziyevaning xotirasi farzandlari, yaqinlari va shogirdlari qalbidan yashaydi.

Mavjuda USMONOVA,
Samarqand shahridagi 21-umumiy o'rta ta'lim maktabi o'qituvchisi.

Ogohlantirishsiz ishdan bo'shatish yoki bo'shah mumkin emas

Mehnat shartnomasini bekor qilish to'g'risida ogohlantirish muddatlariga rioya qilish xodim uchun ham, ish beruvchi uchun ham majburiy hisoblanadi. Unga rioya qilmaslik o'z navbatida turli nizoli holatlar yuzaga kelishiga sabab bo'ladi.

Aytish joizki, ba'zi fuqarolar ogohlantirish xatini olmasam, ish beruvchi mehnat shartnomasini bekor qila olmaydi, deb o'ylaydi. Aslida ogohlantirishda xodimning imzosi bo'lmagan taqdirda ham ish beruvchi xodimning belgilangan muddatda ogohlantirish bilan tanishtirilgani, lekin imzo qo'yishdan bosh tortgani haqida ishonarli dalillar keltirsa, sud xodimni o'z vaqtida ogohlantirgan deb topishi mumkin. Shu bilan birga, xodim ham o'z tashabbusiga ko'ra mehnat shartnomasini bekor qilayotganida, 14 kalendar kunlik yoki ish beruvchini ogohlantirishning boshqa muddatlariga qat'iy rioya etishi lozim. Agar ogohlantirish muddati tugagandan keyin xodim bilan mehnat shartnomasi bekor qilinmagan va yakka tartibdagi mehnatga oid munosabatlar davom etayotgan bo'lsa, mehnat shartnomasini xodimning tashabbusiga ko'ra bekor qilish haqidagi ariza o'z kuchini yo'qotadi, mehnat shartnomasini ushbu arizaga muvofiq bekor qilishga yo'l qo'yilmaydi. Shuningdek, agar xodim mehnat shartnomasini uning amal qilish muddati tugaganligi munosabati bilan bekor qilishga qaror qilgan taqdirda, ish beruvchini mehnat shartnomasi bekor qilinguniga qadar kamida 3 kalendar kun oldin yozma shaklda ogohlantirishi kerak.

Dastlabki sinov muddatida ham tartib shunday. Ya'ni, u tugaguniga qadar taraflarning har biri ikkinchi tarafni kamida 3 kun oldin yozma shaklda ogohlantirgan holda mehnat shartnomasini bekor qilishga haqli. Bu muddatni qisqartirishga faqat shartnoma taraflarining

kelishuvi bilan yo'l qo'yiladi. Qonunchilikka ko'ra, mehnat shartlarining kelgusidagi o'zgarishi ham ogohlantirish asosida amalga oshiriladi. Mehnat kodeksiga ko'ra, ish beruvchi mehnat shartlarining kelgusidagi o'zgarishi haqida xodimni kamida 2 oy oldin yozma shaklda, imzo qo'ydirib ogohlantirishi shart. Ko'rsatilgan muddatni qisqartirishga faqat xodim va ish beruvchi o'rtasidagi kelishuvga ko'ra yo'l qo'yiladi.

Bu tartib turli tashkilotlarda turlicha. Jumladan, ish beruvchi bo'lgan mikrofirmada xodimni mehnat shartlarining o'zgarishi to'g'risida kamida 1 oy oldin yozma ravishda xabardor qilishi kerak. Yakka tartibdagi tadbirkor va ish beruvchi bo'lgan jismoniy shaxs ogohlantirishni 14 kalendar kun oldin beradi.

Nargiza NURNAZAROVA,
Samarqand shahar adliya bo'limi yuridik xizmat ko'rsatish markazi bosh yuriskonsulti.



Farzand ota-onasiga mas'ul

Ota-onalar farzandi uchun mas'ul ekanligi, u voyaga yetguncha g'amxo'rlik qilishi kerakligini bilamiz. Ammo farzandning ota-onasi oldidagi majburiyatlari haqida hamma ham bilmaydi. Qonunchiligimizda bu munosabatning huquqiy asoslari belgilangan.

Farzandning ota-onasi ta'minotiga mas'ulligi shulardan biri. Odatda jamiyatimizda ayni jarayon ixtiyoriy ravishda amalga oshiriladi. Biroq voyaga yetgan, mehnatga layoqatli bola o'z ota-onasiga moddiy yordam berishdan bo'yin tovlasa, jarayonga qonunchilik aralashadi va majburiyat sud qarori bilan belgilanadi.

Ota-ona aliment undirish haqidagi talabni bolalaridan biriga yoki barchasiga nisbatan qo'yishi mumkin. Bu holatda sud voyaga yetgan, mehnatga layoqatli bolalarning barchasini hisobga olib aliment miqdorini belgilaydi.

Qonunchilikka ko'ra, aliment undirish nizosi hal bo'lguniga qadar ham sud tomonidan farzanddan ota-onaga vaqtincha to'lab turilishi lozim bo'lgan summa belgilanishi mumkin.



Voyaga yetgan, mehnatga layoqatli bolalardan undirilayotgan aliment miqdori mehnatga haq to'lashning eng kam miqdorining 11,75 foizidan kam bo'lmashligi kerak.

Mansur HASANOV,
viloyat adliya boshqarmasi xodimi.

REKLAMA, E'LONLAR, BILDIRISHLAR / MUHOJAAT UCHUN TELEFON: 66-233-91-56

DA'VOLAR BO'LSA...

Samarqand tumanida xususiy amaliyot bilan shug'ullanuvchi notarius Ahtamov Erkinjon Tolibjonovich notarial idorasida marhum Djamalov Baxodur Mamatkulovichga (2016-yil 24-avgustda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Ahtamov Erkinjon Tolibjonovich notarial idorasiga murojaat etishlarini so'raymiz.

Manzil: Samarqand tumani Xo'ja Ahror Valiy mahallasi.

Samarqand tumanida xususiy amaliyot bilan shug'ullanuvchi notarius Davronov Mahmud Hasan o'g'li notarial idorasida marhum Axrorova Xalovatga (1994-yil 1-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Davronov Mahmud Hasan o'g'li notarial idorasiga murojaat etishlarini so'raymiz.

Manzil: Samarqand tumani Oqmachit mahallasi, Bag'rikenglik ko'chasi, 4-uy.

Samarqand shahrida xususiy amaliyot bilan shug'ullanuvchi notarius Hazratqulov Mahmud Mo'minqulovich notarial idorasida marhum Nurillayev Akmal Rafikovichga (2019-yil 18-noyabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning

Hazratqulov Mahmud Mo'minqulovich notarial idorasiga murojaat etishlarini so'raymiz.

Manzil: Samarqand shahri Amir Temur ko'chasi, 36-uy.

Payariq tumanida xususiy amaliyot bilan shug'ullanuvchi notarius Ashurova Dilafuz Ziyodullayevna notarial idorasida marhum Abdiyev Temir Azimovichga (2021-yil 12-aprelda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Ashurova Dilafuz Ziyodullayevna notarial idorasiga murojaat etishlarini so'raymiz.

Manzil: Payariq tumani Chelak shaharchasi, Istiqlol ko'chasi, 110-uy.

BEKOR QILINADI

Past Darg'om tumanidagi "SHOXRUX IMONA MUBINA" oilaviy korxonasi (STIR: 306908074) dumaloq muhri va burchak tamg'asi yo'qolganligi sababli bekor qilinadi.

Ishsizlarni kasb-hunarga tayyorlash, qayta tayyorlash va malakasini oshirish o'quv markazidan Sattarov Olimjon Yax'ya-yevichga 2021-yil 8-iyunda berilgan ro'yxat raqami 6400, TN 6400 raqamli guvohnomaning asl nusxasi yo'qolganligi sababli bekor qilinadi.

